

Inicio di caso Tulipan

Ex-minister Besaril den corte awe pa enfrenta cargo di malversacion di placa

Awe mainta, Sr. Guilfred Besaril ta bay ta den corte, enfrentando cargonan relaciona cu su tempo como minister Plenipotenciario na Hulanda. Na mes momento, corte ta bay trata e caso di expropiacion contra e ex-minister.

Lectornan di Bon Dia Aruba por recorda con na juli di 2022, Gabinete Wever-Croes II a anuncia e retiro di Sr. Besaril, bisando e tempo aya cu “Sr. Besaril a tuma e decision aki basa riba un evaluacion personal y familiar.” E tempo ey a anuncia tambe cu Sr. Ady Thijssen lo tuma over e posicion, combina cu e funcion di representante den Union Europeo.

Sinembargo, ya pa october di e aña ey, den un conferencia di prensa, prome minister e tempo aya, Evelyn Wever-Croes a papia di un investigacion na Arubahuis. Wever-Croes a admiti cu algun cos no a bay manera mester a bay na Arubahuis, p’esey el a pidi Centrale Accountantsdienst (CAD) pa haci un investigacion. Wever-Croes a considera importante splica cu oposicion ta bin terciendo den noticia un e-mail di aña 2021 unda ta menciona cosnan cu no ta bayendo bon den Arubahuis.

“Na prome lugha mi tin cu bisa cu mi ta conoce e e-mail aki, mi a ricibi e e-mail aki y e denuncianan di e-mail aki ta exactamente loke mi a pidi pa e investigacion. Kiermen e ta parti di e investigacion cu mi mes a pidi den cuadro di Arubahuis. Mi por bisa cu hasta esun cu a manda e e-mail aki a resulta di ta parti di e investigacion tambe, ta parti di dje”, el a menciona. Igualmente, a declara cu locual cu ta pasando ta cu e investigacion ainda ta den proceso y cu cosnan asina “por tarda”.

Den e conferencia di prensa aki, redactor di Bon Dia Aruba a puntra prome minister si nan ta bay entrega un keho contra Guilfred Besaril. Pa cu esaki, prome minister a declara cu Sr. Besaril a tuma su retiro como minister Plenipotenciario y cu ora un persona ta tuma retiro como minister of parlamentario, nan tin un aña di overbruggingstoelage. Esey



ta nifica cu e ta den periodo ey. Wever-Croes a clarifica cu e investigacion no ta bay riba Sr. Besaril.

Ademas, el a comenta cu te ainda nan no sa si ta bay entrega un keho contra Sr. Besaril pa motibo cu esey especificamente e investigacion ta bay duna.

Esaki tabata banda di un caso civil contra Besaril, den cual ya caba hues a dicta cu e no tabata apto pa traha como polis.

Den e caso civil, a acusa Sr. Besaril Emiti ordennan di pago cu beneficio personal, di a realiza gastonan a costo di Pais Aruba, y di no a haci un control di facturación. Den e caso ey, Hues ta bay di acuerdo pa retira Besaril for di su funcion di polis aunke e la comete abuso di su funcion den calidad di minister plenipotenciario, pero ta di opinion cu tambe por pone e funcion aki di den su calidad di polis. Tambe hues ta bisa cu Besaril su accionnan cu e la haci, no ta hacie apto pa traha como polis mas ni como un funcionario publico.

Un aña despues, sinembargo, na october di 2023, Ministerio Publico a confirma cu tabatin un keho penal contra Sr. Besaril.

Detencion

Na februari di 2024, Besaril a keda deteni relaciona cu e caso denomina Tulipan. El a keda den libertad 24 dia despues, na momento cu OM no a bolbe solicita pa prolonga su detencion.

Investigacion Tulipan ta dirigi riba irregularidadnan na

Arubahuis den e periodo di 2018 te 2021, tempo cu Besaril tabata den funcion di minister plenipotenciario di Aruba na Hulanda.

Caso Tulipan

Segun loke ta conoci di e investigacion, mientras cu e sospechoso tabata den su funcion como minister Plenipotenciario na Hulanda, den poco palabra “el a haci fiesta cu credit card” y a hasta el a huur un propiedad na Hulanda unda a drecha hardin y cura di e cas, a pone un sistema di alarma pa 10.900 euro y a haci reparacionnan den e mesun cas na un costo di 21.000 euro na aña 2020.

Esaki segun rapport di Centraal Accountantsdienst di Aruba (CAD) cu a presenta na Parlamento di Aruba den un reunion publico dia 13 di december 2022. Sr. Roland Pang di CAD a informa e parlamentarionan y pueblo di Aruba con e investigacion a bay. El a crea controversia na momento cu el a splica cu nan a investiga 18 luna so, pa motibo di app di e banco ABN Ambro, algo cu a ricibi critica di un parlamentario riba e hecho cu nan no tabata warda informacion di e cuenta di banco of pakico no a pidi esey for di archivo.

Den esaki, tambe a bira conoci cu el a haci un biahe pa bin Aruba cu no a wordo aproba pa Consejo di Minister na december di 2020, unda el a paga na hotel Divi Village 1.300 euro. Tambe su yiu cu a caba di nace a ser beneficia cu placa di pueblo di Aruba, ora el a drecha henter e camber di e integrante nobo di e famia. Su casa tambe a biaha riba VIP business class na mo-

mento cu Aruba tabata pasando un mal momento debi na pandemia di Covid-19. Esaki ta algun ehemplo chikito di hopi gasto cu e ex-minister a haci.

Desigualdad

Finalmente, maart ultimo, den Corte di Prome Instancia di Aruba a tuma lugha e audiencia preliminar (regiezitting) di e caso penal Tulipan.

Segun e noticiero local Noticia Cla a reporta, durante e audiencia preliminar Besaril a expresa cu e base di su caso mester ta basa riba igualdad di trato y e maneho presupuestario hiba durante su periodo como minister plenipotenciario na Hulanda.

Besaril, ken tabata desempeña e trabao di agente policial pa hopi tempo, a splica den corte cu e ta un homber di ley y cu semper el a actua di forma corecto conforme ley. Awor cu e ta sospechoso den un caso penal, segun e portal a indica, el a sigura cu no ta algo facil pa asimila.

E ex-minister plenipotenciario a indica cu aunke e no ta acusa Ministerio Publico como tal, e caso no ta cana manera debe ser y cu desde principio e caso no a cuminsa di bon manera.

El a splica, como ehempel cu e persona cu tabata representa Aruba na Bruselas, ken tabatin un oficina den Arubahuis pa practicalidad, y ta esun cu a bati alarma tocante supuesto irregularidadnan, no tabata e persona indica pa haci esaki.

El a sigura un biaha cu e no ta culpa Ministerio Publico pasobra ora cu e caso a yega

cerca nan, ya e no tabata corecto y tabata influencia. El a indica cu su caso t a basa riba e aspecto tecnico di presupuesto, pero ta su so ta para den corte, siendo cu esnan cu a tuma decisionnan y a aproba e presupuesto, y esnan complementario no ta para banda di dje – refiriendo na esnan encarga cu e maneho di presupuesto y presonan clave cu tabata involucra den e proceso door di cual e ta e sospechoso principal den dje.

Pa e motibo ey Besaril a solicita testigonan cu por clarifica detayenan cu ta importante den e caso.

Pa loke ta e desigualdad cu segun Besaril, tin den e tratamiento di su caso, NoticiaCla a indica cu e sospechoso a trece dilanti cu na cierto momento, e minister di Rechtsbescherming di Hulanda a hay’e den un situacion igual na su esun cu e ta den dje aworaki, pero cu e minister Hulandes a ser trata diferente.

El a indica cu na Hulanda e minister a sinta henter su periodo sin ningun problema y a yega na un acuerdo di pago via belasting. E mesun situacion a sucede cu e alcalde di Amsterdam, Femke Halsema, ken tambe a logra yega na un acuerdo di pago cu belasting y te cu dia di awe ta fungi como alcalde.

Besaril a remarca cu den ambos caso ta trata di personanan cu a abusa of no a maneha e propiedad y placa di na pais di un manera corecto, pero toch a haya trato diferente compara na su persona. Na Hulanda e personanan aki a sinta, of ta sinta ainda, ainda sin problema, a yega na acuerdo pa paga bek y a haya e oportunidad pa coregi nan error. Contrario na esaki su persona a ser cera den KIA durante 24 dia, na momento cu e caso a cuminsa.

Pa e motibo aki el a expresa cu nan ta tratando e diferente, siendo cu ta trata di e mesun Reino Hulandes y mester traha conforme e asina yama gelijkheidsbeginsel.

Besaril a sigura cu e lo tin oportunidad di demostra su posicion ora trata e caso integralmente den corte, cu lo ta awe mainta.